



Synfocity = 918

mail us at : mzsynfo@gmail.com; mizoramsynod@gmail.com - Phone - 2314648

December 14, 2023

□ Synod Inkhawmpui tuang taka zawh a ni

Mizoram Presbyterian Kohhran rorelna sang ber Synod Inkhawmpui Vawi 100-na chu December 5-10, 2023 chhung khan Mission Veng Kohhran Biak Inah neih a ni a, ni 6 - 9 chhung khan Rorel a ni a, zan lamah vantlang Pathian Biak inkhawm neih thin a ni. December 10 (Pathianni) Chawhmaah Pastor 18 nemngheh niin Pro. Pastor atan mi 18 ruat an ni a, Pastor leh Synod hnuai Department Head pension mi pariat hnenah ngaihhraina thuziak hlan an ni a, chawhnu inkhawmah Synod Moderator Rev. R. Vanlalngjakan Lalpa Zanriah Sakramen a theh a, Minister chatuan ram pan mi pahnih sunna hun hman a ni. Zan Inkhawmah Moderator valedictory sermon ngaihthlak a ni bawk.

Rorel inkhawm tan ni December 6-ah Moderator kal chhuak Rev. Dr. C. Chawngminglian Moderator thar, Rev. R. Vanlalnghaka hnenah Moderator mawhpurhna a hlan a, rorel tan nghal a ni. Synod Inkhawmpuiah hian palai 2120 an kal a ni.

Kum 2024-a Pastoral Ministry thupui atan 'Inpumkhatna' Johana 17:11 chu thlan a ni a, Pastor Bial thar panga - Kolasib Tumpui Bial, Buhchangphai Bial, Darlak Bial, Bawrai Bial, Saipum Bial leh Delhi Bialte hawn tura pawm a ni.

Tun tum inkhawmpuiah hian General 37 a awm a, chung zinga thu pawm tlangpuite:

1. 'Dan lova sumdawng tihrem dan kawng zawn' chu SEC bawh zui tura tih a ni.
2. 'Probationary Pastor lak dan en that' rawtna leh 'Probationary Pastor interview hun chhung ni hnih' rawtna chu SEC-in lo en tha se, Synod-ah thlen leh tura tih a ni.
3. 'Sunday School zirlai bu, Nilai leh Beihruai Thupui bute dik taka chhut' rawtna chu mawhpurhtuten a tul angin hma lak ni se, tih a ni.
4. 'Tualchung Kohhran inkhawm a bi kima inang tlanga kal' chungchang chu tuna kan inkhawm kalphung hi zawm theuh tur a ni e, tih a ni.
5. 'Mizo-in kutpui kan hman thin tha zawka hman' rawtna chu SEC-in a tul angin lo bawh zui rawh se, tih a ni.
6. 'Skill development-ah thalaite tana hma lak dan tur kawng zawn' chungchang chu hmalak mekna a ni a, tha zawka chhonzawm zel ni se, tih a ni.
7. 'Anpui inkawp (same sex marriage) a bo theih nana hma lak' rawtna chu Synod hmalak mekna a ni a, Kohhran tinah hma lak chhonzawm zel ni rawh se, tih a ni.
8. 'Lehkhabu tha chhiara hma kan sawn theih nan hma lak' rawtna chu SEC-in a tul angin lo bawh zui rawh se, tih a ni.
9. 'Contract hna hralh chungchang' chu Kohhran duh loh zawng a ni a, SEC-in hma lo la rawh se, tih a ni.
10. 'Chhungkaw harsate khai chhuak zawng tun aia nasaa hma lak' rawtna chu SEC-in chak zawkin hma lo la rawh se, tih a ni.
11. 'Pem Upa thlan nawnte Certificate pek' rawtna Kolasib Presbytery rawtna chu SEC bawh zui tura tih a ni.
12. 'Fa lak (adoption) chungchanga zirtirna siam' rawtna chu tha tih a ni a, SEC-in an bawh zui tura tih a ni.
13. 'Synod Board/Committee-a Presbytery aiawh thu zui awm thin tihtawp' rawtna chu tha tih a ni a, committee term thar (2025 - 2026) atanga hman tan nghal tura tih a ni.
14. 'Inkhawmpui rorel tawh leh Kohhran Practice mek tihdanglam thuah fimkhur taka kal' rawtna chu fimkhur taka kal zel ni rawh se, tih a ni.
15. 'Synod pem hraina dan 2017 en that' rawtna chu tha tih a ni a, SEC-in hman nghal turin lo ruahman rawh se, tih a ni.
16. 'Chhungkaw kehchhia kan pun zel loh nan hma lak' rawtna chu tha tih a ni a, SEC-in hma lo la rawh se tih a ni.
17. 'Mizo Kristian Lengkhawm Hlate audio-a dah thatna siam' rawtna chu a tha e, SEC-in lo bawh zui rawh se, tih a ni.
18. 'Zirlaite hena Scholarship, Stipend leh Pocket money pek dan en that' rawtna chu hman nghal turin SEC-in lo en tha rawh se, tih a ni.

Heng bakah hian SEC leh Board hrang hrang aţanga thu lut zingah heng - SHSS Boys Hostel Building sak that te, Synod Office zauh leh siamrem te, Council of Churches in Mizoram kalphung leh ruangam rawtna te, Nupa Chungchang Dan en that rawtna te, Synod hnuaiia thawktu transfer and posting chungchanga rawtna te, Synod Pay Commission rawtna te, PRESCOM Department en thatna te, Pathian biak inkhawm kalhmang zir chianna te, Jail tang chhuakte chawlh lailawkna siam chungchanga lo thawk mekte thawhpui thu te chu Inkhawmpui hian a pass bawk a ni.

Synod Inkhawmpui hi Nakkum 2024-ah Mission Vengthlang Bialin Mission Vengthlang Kohhranah a thleng dawn a ni.

Kum 2024 Synod Inkhawmpui Puipa turte chu:

Moderator : Rev. R.C. Lalngakliana
 Secretary (Sr.) : Rev. P.B. Mankima
 Secretary (Jr.) : Upa Vanlalsawma Siakeng
 Finance Officers : Rev. V.L. Luaia Hranleh
 Rev. P.C. Pachhunga
 Statistician : Rev. H. Lalntlanghanga

□ Synod Prison Ministry

December 2, 2023 (Inrinni) khan Synod Prison Ministry buatsaihin Chawlhmun Presbyterian Kohhran Hall-ah, Jail tang chhuakte tana intuai tharna, Follow-Up programme hman a ni.

He hun hi Chawlhmun Bialtu Pastor H. Lalmuanchhanan a kaihrui a, Chawlhmun Kohhran Upa Dengchhungan hunserh a hmang a. He programme-ah hian Aizawl West-II Presbytery chhunga Kohhran tin leh Branch KTP aiawh leh Chawlhmun Kohhran Committee te, Kohhran Hmeichhia leh Branch KTP te, Jail tang chhuakte nen, mi 160 vel an kal a ni. Ni. Zothanpuii Ralte, Counsellor leh Upa Denghmingthanga, Committee member ten thuchah tawi an sawi a, Pu Zosangliana, Special Superintendent, Central Jail-in fuihna thuchah a sawi bawk. Heng bakah hian Jail tang chhuak mi pasarihin testimony an sawi a, Sakawrtuichhun Bial Zaipawl leh Chawlhmun Branch KTP te an zai bawk.

Rev. Lalhmuchhuaka, Prison Ministry Director-in rawngbawlina report a pe a. Rev. H. Lalawmpuia, Committee Member-in lawmthu sawiin, kal khawmte malsawmna an tın a ni.

□ Kohhran Hmeichhia

◆ December 4, 2023 (Thawhtanni) chhun dar 12 khan Mizoram Presbyterian Kohhran Hmeichhia te enkawl Women Centre, Phunchawngah 2023 Batch-a Puanthui zir chhuak mi 40 te thlahna hun hman a ni.

Zirlai thlahna inkhawm hi Dr. Lalthansangi Fanai, Inkhawmpui Lian Vice Chairman-in a kaihrui a. Pi Zothanpari, Inkhawmpui Lian Chairman-in fuihna thu a sawi a, zirlaite hnen aţangin faklam, quartet leh zaipawl te ngaihthlak a ni bawk. Zir chhuakte hnenah hian certificate leh memento hlan a ni.

Puanthui zir chhuakte thlahna hun hi Central Kohhran Hmeichhe committee member te, Phunchawng Kohhran Committee te, Phunchawng Kohhran Hmeichhia, KTP leh Pavalai hruaitute bakah Phunchawng khawtlang hruaituten an hmanpui a ni.

Women Centre-a Puanthui zirna hi kum 2016 August aţanga bul tan niin tunah hian Batch 9-naa zir chhuak mi 40-te nen mi 314 in hlawhtling takin puanthui an zir chhuak tawh a. Women Centre aţanga puanthui zir chhuakte hi mahni kea dinga chhungkaw chawmtu eng emaw zat an awm tawh a ni.

◆ Kohhran Hmeichhia Central Committee chuan Manipur-a harsatna tawkte tanpuina tura ram puma kohhran hmeichhiate sum thawh khawm ₹ 42,06,442/- chu Rev. P.B. Zosaphara, Consultant, Tangphai Provisional Synod, Manipur kal tlangin December 11, 2023 (Thawhtanni) khan an hlan a. ₹ 20,00,000.00 (Nuai sawmhni) chu Indigenous Tribal Leaders Forum (ITLF)-a Relief and Rehabilitation-ah an hlan a. A la bang zawng ₹ 22,06,442.00 erawh chu Tangphai Provisional Synod, Manipur ten an Synod huam chhunga a tul leh pawimawh atana hman turin an hlan bawk.

□ KTP

Synod Hospital Charity Fund puala Branch hrang hrang ten tum khat inkhawm thawhlawm an lak khawm ₹ 11,81,930/- leh Grace Home Cook hlauh tur ₹ 96,000/- te Central KTP hruaituten Synod Hospital Director Dr. Lalthakima hnenah an hlan.

❑ **Campus Ministry**

December 12, 2023 (Thawhlehi) zan dar 8:00 khan Electric Veng Kohhran Hall-ah Synod Campus Ministry buatsaihin Zirlai Pual Christmas Carol programme hman a ni.

Programme-ah hian Pi C. Vanlalruati, Treasurer, MSEU-in hunserh a hman a, Rev. H.L.Thianghlina, Campus Ministry Director-in kalkhawmte inlawmna leh inhmelhriattirna a nei a ni. He hunah hian zaithiam hrang hrang, Mal zai - NI. Melody Lalzirliani, NI. R. Lalrinmawii leh Tv. Zorinsanga Sailo te, Zaipawl - Mizoram Christian College Choir, Zoram Medical College EU Choir, J. Thankima College EU Choir, Auxiliary & Midwifery Choir te, One in Christ leh Fak lam Electric Veng Branch ten hun an hman a. Rev. Dr. K. Lallawmzuala, Executive Secretary leh Upa Dr. Samuel V.L. Thlanga ten thu an sawi bawk. Programme hi Tv. Lalchhanhima Sailo leh Dr. Jennifer Rohlupui ten an kaihuai a ni.

❑ **Trust**

December 12, 2023 (Thawhlehi) khan Baktawngah Pastor Quarters fencing en felin Pu Lalramenga Royte, J.E. a kal.

❑ **Synod Hospital, Durtlang**

Synod Hospital-a Dialysis Unit chuan hmasawn zelin Room tihzauh leh siamthat hna thawh a ni a. December 13, 2023 (Nilaini) chawhma dar 10:00 khan Dialysis room thar hi Rev. H.C. Khaicho, Hospital Chaplain-in Pathian hnenah a hlan.

Room thar hlan hi Dr. Lalthakima, Director-in kaihuaiin, Upa Lalrinmuana, Co-ordinator-in Technical Report a pe a. Dr. Joseph Lalhmachhuana, Nephrologist (Super Specialist)-in lawmthu sawina leh Dialysis Unit Report a pe. Dialysis room siam thar hna hi August 16, 2023 khan tan a ni a, Room thar siam nan leh Dialysis khawl thar lei nan a vaiin ₹ 29,34,780/- sen a ni.

Synod Hospital Dialysis Unit hian hma sawn zelin tunah hian Dialysis khawl 7 neih mek a ni a. Kum 2023 chhungin Dialysis wawi 2331 tih tawh a ni. Tunah hian Nephrology Ward siam turin hmalak chhoh mek a ni bawk.

Tun dinhmunah Dialysis Unit-ah hian thawktu pakua an awm mek a ni.

❑ **MKHC General Meeting wawi 29-na neih a ni**

December 14, 2023 (Ningani) chawhma dar 11:00 khan Synod Office Devotion Hall-ah Mizoram Kohhran Hruaitute Committee (MKHC) General Meeting wawi 29-na neih a ni a. Meeting hi Rev. Dr. C. Chawngmingliana, Chairman, MKHC-in a kaihuai a, Recording Secretary-te chu Upa Lalnilawma Colney, Jt. Secretary leh Rev. Lallawmsanga, Jt. Secretary te an ni.

Rev. Hanania Lalringgheta, EFCI-in hunserh a hman zawhin National Tobacco Control Programme-in an dil angin hun pek an ni a. NTCP State Nodal Officer, Dr. H. Lianthangpuian thu tawi a sawi zawhah Pu R. Lalremruata, State Consultant, NTCP-in Presentation a buatsaih chu en ho a ni. Hemi hnu hian inhmelhriattirna leh palai inchhiarna neih zui a ni. Secretary Report leh Financial Report ngaihthlak a nih hnuin rorel zui a ni a, MKHC Hruaitu (Office Bearer) tharte pawmna leh Executive Member tharte pawmna neih a ni a. Tul dangte ngaihtuah ho a ni bawk. Rev. Zion Varmawia Fanchun, Vice Chairman, MKHC-in lawm thu a sawi a, Rev. C. Zorammawia, Senior Executive Secretary, Mizoram Presbyterian Kohhranin tanngtaiin hun a khar a. Meeting zawhah hian MKHC Chairman kal chhuak Rev. Dr. C. Chawngminglianin Chairman thar Rev. R. Vanlalngkhaka hnenah charge a hlan nghal bawk.

❑ **FG&CC**

December 14, 2023 (Ningani) zan dar 7:30 hian Upper Republic Kohhran Jubilee Hall-ah FG&CC Kristian Chhungkaw Film insiamsiak result puan leh lawmman sem a ni dawn.

Film insiamsiakah hian lawmman Pakhatna ₹ 2,00,000, Pahnihna ₹ 1,00,000, Pathumna ₹ 50,000 a ni a, top ten-a lang chin tan lawmman siam niin, a tel hrim hrim tan pawh lawmman hi siam a ni a, Best Actor leh Best Actress tan lawmman siam a ni bawk.

FG&CC hian kum 2010 khan Kristian Chhungkaw Film Insiamsiak hi a lo buatsaih tawh a, khami tum khan pakhatna chu Dinthar Kohhran an ni. Result puan leh Lawmman sem programme hi Synod Information Youtube Channel leh Hruaina Eng Channel (LPS 15 & Zonet 12)-ah te LIVE-a pek chhuah a ni ang.

❑ **Hindi Bible School Graduation Day**

December 15, 2023 (Zirtawpni) chawhnu dar 2:00 hian Presbyterian Hindi Bible School chuan Mission Vengthlang Kohhran Jubilee Hall-ah Graduation Day wawi 71-na an hmang dawn a. Graduation inkhawm hi Rev. Zochhuanmawia, Principal-in a kaihruai ang a, inhmelhriattirna leh report te a ngaihtlak a nih hnuah Result puan a ni ang. Upa Lalthahluna Ralte, Co-ordinator, SMB-in zirlai ti thate hnenah Certificate leh lawmman a hlan ang a, Rev. R. Lalhmingsanga, Secretary, SMB-in thuchah a sawi ang a, zirlaite Pathian hnenah a hlan dawn bawk a ni.

❑ **Synod Office**

December 20, 2023 (Nilaini) chawhma dar 10 hian J.M. Lloyd Hall, Synod Office-ah Synod Office-a thawktu pension-a chhuak tur leh hmun danga insawn turte thlahna hun hman a ni dawn.

Programme hi Rev. C. Zoramawia, Staff Welfare Chairman-in a kaihruai ang a, Upa Lalbiakenga Fanai, Coordinator-in thlah turte chanchin tawi a sawi ang a, ngaihruina thilpek leh certificate hlan an ni ang a, thlahte hnen atangin thusawi tawi ngaihtlak a ni ang a. Rev. Dr. K. Lallawmzuala, Executive Secretary-in tawngtaisakna hun a hmang ang.

Tun tumah hian Synod hnathawk, pension-a chhuak tur mi pariat leh hmun danga insawn tur pali an awm a ni.

❑ **Synod Relief Fund**

Tun hnaia harsatna hrang hrang tawkte hnenah Synod Relief Fund atangin hetiang hian chhawmdawlna pek a ni.

S.No	Khua/Veng	Pek chhan	Chhungkaw zat	Pek zat
1.	Hmawngkawn	Damlo	3	₹ 30,000/-
2.	Ramthar Vengthlang	Damlo	3	₹ 30,000/-
3.	Thenzawl Field Veng	Damlo	2	₹ 20,000/-
4.	Ramthar North	Damlo	2	₹ 20,000/-
5.	Falkawn Hmarveng	Damlo	2	₹ 20,000/-
6.	West Phaileng	Damlo	1	₹ 10,000/-
7.	Tualte	Khawsak harsa	1	₹ 10,000/-
8.	Samtlang	Damlo	1	₹ 10,000/-
9.	Darlawn	Damlo	1	₹ 10,000/-
10.	Aizawl Venglai	Damlo	1	₹ 10,000/-
11.	East Phaileng	Damlo	1	₹ 10,000/-
12.	Melriat	Kangmei tuar	1	₹ 8,000/-
Belh khawm				₹ 1,88,000/-

❑ **FM Zoawi - Aizawl & Lunglei : Hruaina Eng Radio Programme**

December 15, 2023 (Zirtawpni) @ 7:30 p.m. :

Fakhla huang : Lalhruaizeli, Lalrinawmi leh Remsangpuia

Thusawi : Rev. Lalbiaksanga Pachuau (ATC) - Berampute leh Krismas

❑ **Su Samachar Prasaran Programme :**

December 17, 2023 (Pathianni) 5:30 pm. :

Group/Choir/Solo : Hindi Bible School - Barmaja, **Group/Choir/Solo** : Vaivakawn Masihi Sangati - Aye he (Krismas), **Sermon** : Rev. Darkhuma - Yishu Masih Ka Jaum Ke Vishae, **Group/Choir/Solo** : Venghnuai Kohhran - Daya Ka Sagar, **Group/Choir/Solo** : Hindi Bible School - Dhunia main chhaia

❑ **Hruaina Eng TV Programme**

14.12.2023 (Ningani) 6:30 pm : Thupui zir bing - Krismas - A lawm dan

7:30 pm : FG&CC lawmman sem - LIVE

15.12.2023 (Zirtawpni) 5:00 pm : Kristian Naupang Pual

16.12.2023 (Inrinni) 5:30 pm : Puitling Sunday School Zirlai

17.12.2023 (Pathianni) 8:00 am : Weekly round up

5:30 pm : Su Samachar Prasaran

18.12.2023 (Thawhtanni) 8:30 pm : Hruaina Eng Luang chhuak

19.12.2023 (Thawhlejni) 8:30 pm : Nilai Thupui zir ho

HRIATTIRNA

December 20, 2023 (Nilaini) chawhma dar 10:00-ah Synod Office-a thawktuten inthlahna hun an hman dawn avangin hemi ni hian Synod Office a dawr theih dawn loh a, Synod Office dawr duhte tan dawr theih ni hnuhnung ber chu December 19, 2023 (Thawhlehi) a ni ang.

Synod Office hi December 21, 2023 (Ningani) aṅgingin khar ṅan a ni ang a, January 8, 2024 (Thawhṅanni)-ah hawn ṅan leh a ni dawn a ni.

MISSIONARY TRAINING COLLEGE (MTC) HRIATTIRNA

Missionary Training College (MTC)-ah Bachelor of Missiology (B.Miss) zir duh tan dil theih a ni leh ta. Dilna Form leh Prospectus hi Rs 50/- in office hun chungin MTC Office aṅgingin lak chhuah theih a ni e.

Dil thei chin : Cl - XII pass chin
 Dilna theh luh hun hnuhnung : 16 February, 2024 (Friday)
 Entrance Test : 19 March, 2024 (Tuesday); 9:30 AM @ MTC
 Interview : 21 March, 2024 (Thursday); 10:30 AM @ Synod Committee Room I

Sd/- Principal
 Missionary Training College
 Mission Vengthlang
 Ph. No. : 0389-2328525/9612164982

SYNOD BOOKROOM LEHKHABU CHHUAK THAR - DECEMBER, 2023

1. KṬP General Conference Hla Bu Thar:	₹ 60/-, ₹ 80/-, ₹ 150/-
2. Synod Calendar lian:	₹ 350/- ₹ 550/- ₹ 980/-
3. Presbyterian Pastor Pension-te Tawn Hriat:	₹ 200/-
4. Hunpui Sermon Bu 2-na: <i>Upa Dr. K.C. Vannghaka</i>	₹ 250/-
5. Meialh Thiltithe: <i>Frederick Lalrindika</i>	₹ 500/-
6. Zui Tlak Pathian Ngei A Lo Ni: <i>Lalrinkimi</i>	₹ 250/-
7. Tuarna Thuruk: <i>Rev. V.L. Zaikima</i>	₹ 250/-
8. Francis-a Tingtang: <i>Gilbert Chalthianga</i>	₹ 250/-
9. Kalphung Thar - Ringtuteah: <i>Upa F. Engnghaka</i>	₹ 200/-
10. Hniak Hlu: <i>Zaii Kiangte</i>	₹ 250/-
11. Chhung Inkhawm Bu 2-na: <i>C. Januari</i>	₹ 250/-
12. Malsawm I Ni: <i>Zaii Kiangte leh Jobedy Kiangte</i>	₹ 120/-
13. Bible Thawnthu-2, 3, 6, 7 : <i>C.Laizawna</i>	₹ 100/-
14. Ram Tha Lehzual: <i>Remlalfaka Pachuau</i>	₹ 400/-
15. Ni Rei Ber Ni: <i>Hauṅhuama lehlin</i>	₹ 300/-
16. Hre Rawh: <i>Jacob Rosangliana Pachuau</i>	₹ 100/-
17. Khawl Bawm: <i>Johana</i>	₹ 250/-
18. Beiseina Eng: <i>Dr. Lalmalsawma Nghaka</i>	₹ 50/-
19. Thlirtu Khawthlir: <i>Rosangzuala</i>	₹ 250/-
20. Thu Ril Fun Khawm: <i>C. Lalzova</i>	₹ 250/-
21. Pi leh Pute Serh Leh Sang: <i>Kauva</i>	₹ 150/-
22. YMA Khawmpui Lian Biate-ah: <i>Zomawia Kiangte</i>	₹ 190/-
23. Ka Zinna Ram: <i>Dr. Lalramchuani Sena Samuelson</i>	₹ 250/-
24. Kan Sulhnu: <i>C.L. Ruala</i>	₹ 350/-
25. Mizo Ṭawng Leh A Chheh Vel Thil Hlute: <i>C. Lalzova</i>	₹ 330/-
26. Fam Lalzova : <i>R. Lalrawna leh R.K. Lalhluna</i>	₹ 200/-
27. Mizo Independence Movement: <i>Dr. Lalramchuani Sena Samuelson</i>	₹ 300/-
28. Treasure Island: <i>C. Laizawna lehlin</i>	₹ 150/-